

TEZĂUR LITURGIC
21 IANUARIE

ACATISTUL
SF. CUVIOS
MAXIM GRECUL
DE LA
RADONEJ



MOSCOVA, 2000



Акафист святому преподобному и богоносному отцу нашему Максиму Греку

Кондак 1

Избранный служителю Предвечнаго Слова,
всехвальне отче наш Максиме, в преславней
земли Греческой прозябший и в державе
российстей подвизи просиявший, поучениями и
писании твоима в благочестии и богообщении
нас утвердивый, величаем ныне многотрудное
житие твое и на предстательство твое пред
престолом Триипостаснаго Бога нашего
упование свое возлагая, вопием ти сице:
Радуйся, преподобне и богоносне отче Максиме,
на путь спасение вечнаго нас наставляющий!

Икос 1

Ангелов и человеков Творец и всяя твари
Зиждитель, содержай в деснице своей судьбы
царств и народов и над каждым из чад своих
отеческое промышления являй, произрасти ты,
богомудре отче наш Максиме, от корени
именитаго и рода знатнаго, благоволи украсити
ты в премудрости отец святых и аки
просветителя всемудраго направи ты в великое

княжество Московское, да укрепиши народ руссий в вере истинней и подлинными наследниками духовнаго богатства Византии ны сотвориши. Мы, сия ныне поминающе, просим тя, приклони к нам милосердие Всемудраго и Всемогущего Отца Небеснаго и прими милостивно похвалы сия:

Радуйся, богодухновенных отец достойных приемниче и сонаследниче;

Радуйся, философов и риторов премудрых пречудный наставниче;

Радуйся, всех истины взыскующих небесным благословением осеняющий;

Радуйся, от путей соблазнов и прельщений их удаляющий;

Радуйся, в богомыслии разум нас утверждающий;

Радуйся, в сердцах наших пламень любви к Богу и ближним возжигающий;

Радуйся, тихим светом надежды ны благодатно озаряй;

Радуйся, в вере твердыми выну быти ны сподобляй;

Радуйся, преподобне и богоносне отце наш Максиме, на путь спасения вечнаго нас наставляющий!

Кондак 2

Видевше благочестивыя и богомудрыя родителя твоя, святой Максиме, запущение отчизны их по падении преславнаго царствия греческаго, обаче уразумеша, яко выну милостив есть Господь к верным своим, и во уповании таковом и житии по заповедем евангельским тя утвердиша. Мы же, сия воспоминающе, Господеви поем: Аллилуйа!

Икос 2

Разум твой в послушание вере отдавше, преславными родители твоима и иными добрыма наставники поучаемый, богоносне Максиме, в благословении пред Творцем всяческих начаток премудрости твоя и дел благих положил еси; послеже усердно поработал еси учения отец святых и философов премудрых постигая, восходя по лестнице добродетелей в меру возраста духовнаго. Сего ради величаем тя сице:

Радуйся, дары благости и добраго совета нас преображающий;

Радуйся, кротостию голубиною и мудростию змеиною нас обогащающий;

Радуйся, ко усердному чтению святаго Писания ны побуждаяй;

Радуйся, к усиленной молитве и в псалмопении нас утверждающий;

Радуйся, в трезвлении духовнем и уповании на Бога всех нас утверждающий;
Радуйся, душетленных навыков и злых обычаев удалятися нас научающий;
Радуйся, в соблазнях и прельщении сущих помощь небесную посылающий;
Радуйся, в милосердии к себе и ближним наших возрастати нам помогающий;
Радуйся, преподобне и богоносне отце наш Максиме, на путь спасения вечнаго нас наставляющий!

Кондак 3

Силою благодати Божия хранимый, блаженне Максиме, в земли италийстей сый, не врежден пребыл еси от тлетворнаго духа века того, и, пчеле трудолюбивей подобно, нектар благий мудрости отовсюду сбирал еси, в познании истины Христовей возрастая; Иерониму благочестивому внимая к иноческому житию устремил еси мудрое сердце твое, отче святой; Господеви же неустанно возносил еси пение ангельское: Аллилуйа!

Икос 3

Имуще в души твоя ревностное желание Спасителю Нашему, за ны Распятому, всеусердно послужити удалися еси, богославне Максиме, из чудней земли Италийстей на

преславноу гору Афонскую, идеже монашество и священство сподобился еси прияти: наставлением старец святогорских следуя, от добродетели к добродели восходил еси, угодниче Христов, внутреннею человека обновляюще и образ Божий в себе отверзая. Сему же деланию духовному и нас настави, да зовем ти:
Радуйся, от суеты мирския к священному безмолвию притекий;
Радуйся, упокоение от невзгод и треволнений в тихих обителях обретый;
Радуйся, свет нетварный еще на земли созерцавый;
Радуйся, неизреченную сладость богообщения познавый;
Радуйся, духовныя очи наша ко зрению Бога изошряющий;
Радуйся, ушеса наша к слышанию небесных глагол отверзающий;
Радуйся, даром различения духов нас обогащаяя;
Радуйся, от заблуждений и падений духовных нас свободяя;
Радуйся, преподобне и богоносне отце наш Максиме, на путь спасения вечнаго нас наставляющий!

Кондак 4

Бурю страстей и сомнений греховных молитвою, постом и трезвением сердечным победил еси, всехвальне отче наш Максиме, ибо на твердом камени истиннаго и неприложнаго исповедания Христова положил еси основание душевной храмины твоея. Сего ради молим тя: утверди и нас в неприложном уповании на Милосердие Святей Троицы, да с тобою сподобимся во веки воспевати: Аллилуйа!

Икос 4

Слышавше благоверный великий князь Московский Василий Третий, яко во обителях афонских книжницы велемудрыя и философы богопросвещенныя обретаются, повеле призвати оныя в державу свою, дабы народ русский в вере Христовой и делании заповедей евангельских утвердити и укрепити. Ты же, преблагословенный Максиме, благодатию Божиею присноукрепляемый, отбыл еси в пределы московския, дабы волю Божию исполнити и правду Его явити в стране нашей. Сего ради просим тя: нас, слабых в вере и в уповании на Христа, Господа Нашего, укрепи, да зовем ти сие:
Радуйся, тягот дороги дальния и жития в пределех северных не убоявыйся;
Радуйся, чуждый кровию, обаче духом своим

для русского народа ставший;
Радуйся, землю греческую и российскую паки и
паки в вере соединяющий;
Радуйся, от суеты и преходящих пристрастий
ны исцеляющий;
Радуйся, к вечней правде Божией взоры духа
обращати ны научающий;
Радуйся, идолы духовные о камень истины
Христовей разбивающий;
Радуйся, Христа – Спасителя паче всего земнаго
чтити подвизающий;
Радуйся, милость Всенепорочней Богоматери к
нам приклоняющий;
Радуйся, преподобне и богоносне отце наш
Максиме, на путь спасения вечнаго нас
наставляющий!

Кондак 5

Богоявленной и боготочней звезде, путь ко
Христу озаряющей и освящающей воистину
уподобился еси, преподобне отче наш Максиме,
егда в пределах российстих сый, истину Божию
безстрашно исповедал и проповедал еси,
суеверия языческа и звездопоклонническую
ересь, мздоимство и неправдолюбие, забвение
заповедей и любви к ближнему всеусердно
обличал еси. Сего ради просим тя, всеблагий
наставниче наш, научи нас токмо Спасителю
служити, не соблазняясь земными преходящими

благами и сподоби во веки нужно с тобою выну воспевати Христу: Аллилуйа!

Икос 5

Видевше тя, благословенне отче наш Максиме, благочестивыя русстии люди, почаху приходить к тебе в прехвальную Чуда Святаго архистратига Михаила обитель, иже во граде Москвы, совета, наставления, утешения и молитвы твоея ради. Ты же, никого от пришедших не отринув, ко пользе ближних твоих всеусердно послужил еси. Мы же, веруя, яко ты ныне во благодати Господней сый, сугубо внемлеши мольбам нашим с надеждою, отрадою и умилением воспеваем ти сице:

Радуйся, старче благий, в возрастании

богопознания ближних твоих утверждавый;

Радуйся, от духовной дремоты и праздности духа приходивших к тебе исцелявый;

Радуйся, подлинному благочестию и любви к ближнему я научавый;

Радуйся, в уповании на Премудрость

Милосердного Творца их укреплявый;

Радуйся, от закваски фарисейския и лицемерия преславно исцеляяй;

Радуйся, от теплохладия и омертвления сердечнаго благодатно избавляяй;

Радуйся, о просвещении духовных очес наших Бога умоляяй;

Радуйся, в тишине помыслов хвалити Христа
всех нас подвизаяй;
Радуйся, преподобне и богоносне отче наш
Максиме, на путь спасения вечнаго нас
наставляющий!

Кондак 6

Проповедник и ревнитель жития благочестиваго
воистину явился еси, всеблагодарен отче наш
Максиме Святогорче, яко твердо и
неукоснительно обличал еси, незнание истин
веры Христовой, несоблюдение заповедей
Спасовых, исполнение токмо внешнего обряда,
безо всякого подвига духовнаго в суетней
надежде токмо на внешнее благочестие,
наставлял бо еси всем сердцем и всем
помышлением, всем естеством нашим
возлюбити Иисуса Сладчайшаго и умиленно
воспевати Ему благодарения: Аллилуйя!

Икос 6

Воссиял еси светом богодарованныя
премудрости твоя, о всехвальне отче наш
Максиме, в земле Русстей, яко мнозиих во
истине Христовой преславно утвердил, яко
книзи Писания священнаго, святых отец
творения и толкования перевел еси с наречия
греческаго и латинскаго на язык словенский,
яко богомудрия сочинения в назидание и пользу

нам оставил еси, преподобне. Сего ради, величая
прехвальные труды твоя, глаголим ти сице:
Радуйся, от мрака невежества к свету
Премудрости Божия возводи;
Радуйся, заблуждающихся и сомневающих ко
истине Христовой кротце приводяй;
Радуйся, труд переводчиков и книжных
справщиков с небес благословляющий;
Радуйся, филологом и языковедам помощь твою
посылающий;
Радуйся, разум богословов и благовестников
светом небесным осеняющий;
Радуйся, иноков и мирян в богоугодном житии и
милосердии укрепление;
Радуйся, пресвитеров в благочестии и
трезвлении утверждение;
Радуйся, архиереев во трудах их благодатное
удобрение;
Радуйся, преподобне и богоносне отче наш
Максиме, на путь спасения вечнаго нас
наставляющий!

Кондак 7

Хотяще нам славити тя, о богоносне отче наш
Максиме, ведаем убо, яко язык человеческий не
возможет достойно воспети всю полноту
богоугодных подвигов твоих, все терпение твое,
яже подъял еси, егда иерарси нечестивыя Тайн
Божественных тя лишиша. Како убо возможно

воспети глубину смирения твоего и высоту упования на Всемогущество и Любовь Отца Нашего Небеснаго, иже, аки слугу своего возлюбленнаго и ученика Христова прия ты и на лоне Авраамовем на веки упокои ты? Сего ради на предстательство твое надеяние наше возлагая, поим о тебе Вседержителю: Аллилуйа!

Икос 7

Новый Максим – исповедник воистину явился еси, преподобне отче, яко же и святой твой покровитель исповедал еси пред властителями нечестивыми истину учения Спасителя Нашего, от коей ни одесную и ни ошуюю не отошел еси, отче святой и богомудрый. Сего же ради от властей предержащих лишения, изгнание и заточение темничное притерпел еси. Мы же, исповеднические подвизи твоя желая славосновити, таковыя похвалы приносим ти:
Радуйся, во страданиях твоих десницею
Всевышняго укрепленный;
Радуйся, яко злато в горниле испытаний тяжких
преображенный;
Радуйся, купно с исповедническими лики во
славе ныне торжествуяй;
Радуйся, купно с благовестники и просветители
хвалу Богу воспеваяй;
Радуйся, подобно Златоусту, за вся благодарити
Творца нас научаяй;

Радуйся, в радости и благоденствии помнити о милостех Господних подвизаяй;
Радуйся, в час скорби упование на высшее милосердие возлагати наставляяй;
Радуйся, горести и страдания наши в отраду и благополучие пречудно претворяяй;
Радуйся, преподобне и богоносне отце наш Максиме, на путь спасения вечнаго нас наставляющий!

Кондак 8

Странно бе людем благочестивым и благосердным зрети, яко ты, святыи Максиме, в темнице заключенный и право писати лишенный, углем на стенах канон Всесвятому Духу-Параклиту написал еси; мы же, величая веру твою в животворящую благодать Всеблагаго Утешителя, смирение и незлобие твое воспеваем со умилением и просим тя, отче святыи, сподоби и нас милости и даров Святаго Духа, да поем Ему всерадостно: Аллилуйа!

Икос 8

Всего себе подвиг еси на служение Господеви, богославне отче наш Максиме, ибо несомненно веровал еси, яко «во Отце существенне и Дух: от Него бо, аки от Единого Начала, соприисущна Оба сияют и пребывают о Себе в Живоначальных Ипостасех Своих». Мы же ныне

величаем тя, святой отче, неизреченных тайн Божественных созерцателя всеблаготворительного, еще на земли нетварным сиянием осененного и просим тя: молитвы благоприятными твоими озари и нас светом Фаворским и прими благосклонно лице сия:

Радуйся, Живоначальная и Единосущная Троицы Всесвятые премудрый служителю;

Радуйся, величая Отца Предвечного и Безначального всеблагий тайнозрителю;

Радуйся, Сына Божия, Искупителя, вернейший последователю;

Радуйся, милосердия Всесвятого Параклита к нам всеусердный приклонителю;

Радуйся, ангельских хоров и собора праведных вседостойный сонаследниче;

Радуйся, преподобных отец афонских сомолитвенниче и собеседниче;

Радуйся, земли российские и еллинские вседрагое украшение;

Радуйся, Вселенской Церкви Христовой преизрядное похвало и утверждение;

Радуйся, преподобне и богоносне отце наш Максиме, на путь спасения вечного нас наставляющий!

Кондак 9

Всяческие муки душевные и телесные с достоинством священноинока и кротостию

претерпел еси, всеблаженне Максиме; сего же ради утешения преславного сподобился еси от Господа Нашего, иже посла к тебе единого от ангел своих, иже возвести ти, яко терпением твоим венец нетленный на небесех обрести имаши. Ты же, отче преподобне, с благодарностию воспел еси Господеви: Аллилуйя!

Икос 9

Вития многовещанная и поэты всеискусная, аки рыбы безгласные, немеют пред величием подвигов твоих, богоблаженне отче наш Максиме, ибо кто возможет достойно и всеправедно воспети вся труды твоя, яже подъял еси вящей славы Божия ради и пользы и просвещения ближних твоих, в странах италийской, греческой и в пределах державы российстей, ибо кто по достоянию воспоеет терпения и муки твоя, иже с надеждою великою и кротостию ангельскаго приял еси, обаче на милость твою к нам уповая, смиренным сердцем возносим ти похвалы сия:

Радуйся, усыпленных совестей скорый
возбудителю;

Радуйся, сомнений и треволнений душевных
благостный умирителю;

Радуйся, всех чтущих память твою преславный
хранителю;

Радуйся, носителей имени твоего благодатный

попечителю;
Радуйся, благих дел и милосердия богомудрый наставниче;
Радуйся, изгнанных, униженных и обездоленных небесный заступниче;
Радуйся, правды ради подвизающихся всеблагий покровителю;
Радуйся, неправедно гонимых и обидимых предобрый утешителю;
Радуйся, преподобне и богоносне отче наш Максиме, на путь спасения вечнаго нас наставляющий!

Кондак 10

Спасительный подвиг твой, о всеславне Максиме, совершивше, в руке Божии дух твой предал еси, с надеждою и отрадою велиею; ангелы же Господни вознесоша душу твою во обители Отчии; идеже Вседержатель венча тя нетленным венцем; сего ради просим тя, святыи отче наш Максиме, егда же и мы оним сном смертным усыпати начнем, умоли Господа кротко душу нашу от тела отделить и власти бесовские ны избавити, да с тобою купно Всесвятей Троице воспоим: Аллилуйа!

Икос 10

Стеною всеблагомощных молитв твоих храниши днесь весь род христианский, о преподобне отче

наш Максиме, и во всяком скорбном обстоянии помощь твою даруеши всем, имя твое всечестное призывающим. Ты бо во дни брани со шведами явился еси святому благоверному царю Феодору Первому, иже опочи под стогнами града Юрьева и глагола еси ему: «Изыди из шатра, да не убиен будеши», и тако живот его сохрани, послеже и иных чудес множество сотворил еси. Сего ради мы с любовью таковыя похвалы тебе приносим:

Радуйся, благочестивейшаго государя от гибели лютей на поле брани сохранивый;

Радуйся, благоволение и милость твою велиему множеству чтущих тя явивый;

Радуйся, от опасений и злых человек выну нас оберегая;

Радуйся, от прельщений и искушений бесовских избавляя;

Радуйся, благоговению пред святынею церковною нас обогащающий;

Радуйся, узким путем шествовати ко Господу научающий;

Радуйся, от широких дорог соблазновских удаляющий;

Радуйся, от уз неведения, заблуждений и недоумений скоро разрешающий;

Радуйся, преподобне и богоносне отце наш

Максиме, на путь спасения вечнаго нас наставляющий!

Кондак 11

Пения акафистное радостно приносим ти, о богоблаженне отче наш Максиме, и молим убо тя: всеблаготворительным предстательством твоим исцели недуги наши душевныя и болезни телесныя, отврати от суеты помышления наши, настави нас в благочестивом житии, бедным отраду и утешение ниспошли, богатых к милосердию и благотворению подвижни, и всех нас настави нелицемерно Господеви воспевати: Аллилуйя!

Икос 11

Свет нетварный купно с сонмом отец преподобных созерцаеши ныне, богоблаженне отче наш Максиме, яко предстояй пред престолом Всесвятых и Единосущных Троицы и молишися о спасении и благоденствии всех христиан. Мы же, Святую память твою почитающе, с надеждою взываем к тебе, угодниче Христов, сотвори твою молитву о нас, да отстранимся от греха и возможем еще на земли суще возрадоваться о Господе, молитвами угодников своих, милующего преизобильно и спасающего ны. Сего ради мы паки со умилением произносим ти похвалы сия:

Радуйся, благовестников в делах проповеди
Евангелия укрепляющий;
Радуйся, делателей на пустующия нивы
Господни посылающий;
Радуйся, ревновати о спасении ближних нас
научающий;
Радуйся, слова мудрыя во уста наши
влагающий;
Радуйся, от сомнений и маловерия скоро
исцеляющий;
Радуйся, в час недоумения разум наш мыслию
благою озаряющий;
Радуйся, внутренний мрак душ наших светом
Христовым озаряющий;
Радуйся, от теплохладия и немилосердия сердца
наша освобождающий;
Радуйся, преподобне и богоносне отче наш
Максиме, на путь спасения вечнаго нас
наставляющий!

Кондак 12

Благодать и дары Всепроблагаго и
Всепресвятаго Духа Утешителя, Хранителя
жизни нашея испроси нам, всеблагословенне
отче Максиме, ты бо ныне во славе купно со
праведными сыны Божиими и сонмами
херувимов и серафимов предстоиши
огнезрчному престолу Триипостасного Бога
Нашего и простираеши преподобническа руце

твои ко Отцу Света и Творцу миров и взываюши Ему: Аллилуйа!

Икос 12

Стеною богоприятных молитв твоих, преподобне отче наш Максиме, огради ны ото всякаго зла, скорбей и болезней избави ны, не посрами убо упования нашего, вемы бо, яко много может молитва твоя, отче праведный, у Царя Небеснаго, яко ты в сомне преподобных отец предстоиши пред престолом Всевышнего и предстательствуеши о всех, вопиющих ти сице: Радуйся, покаянием души наши обновляти научаяй;

Радуйся, от уныния и тоски всех нас исцеляяй;

Радуйся, от ропота и неверия благодатное освобождение;

Радуйся, милосердия Божия к нам приклонение;

Радуйся, не творение, а Творца Предвечнаго, чтити ны научающий;

Радуйся, от суетумудрия и пустословия ны отвращающий;

Радуйся, в преподобии и правде ны преславно утверждающий;

Радуйся, в Бозе все житие наше благодатно устрояющий;

Радуйся, преподобне и богоносне отце наш Максиме, на путь спасения вечнаго нас наставляющий!

Кондак 13

О преблагословенне отче, предобрый наш заступниче и любимый покровителю, всехвальне Максиме Святогорче! Милостивно приими усердное возносимое тебе пение и хваление, настави ны, пользуясь благами земными, не грешити против Господа Нашего; сподоби веру нашу плодотворней быти дел благих ради, яко да сподобимся в мире скончати земное житие наша и возможем с тобою купно Иисусу Сладчайшему во веки воспевати: Аллилуйя!
Сей Кондак глаголется троекратно, и затем паки Икос 1 и Кондак!

